

# INUIT ATAQATIGIIT INATSISARTUNI



UKA 2023/116

12.10.2023

Peter Olsen

**“Inuuniarnermikkut ajornartorsiuteqartut pillugit siunnersuisooqatigiit”  
pilersinneqarnissaannut Naalakkersuisut pequneqassasut Inatsisartut  
aalajangiiffigisassaattut siunnersuut.**

**(Inatsisartunut Ilaasortaq Jens-Frederik Nielsen, Demokraatit)**

## **Oqaaseqaat:**

Naluneqanngitsutut Inuit Ataqatigiit ilisarnaatitta ilaat tassaavoq, nunatsinni sanngiinnerusortatsinnik illersuisuunerput; Meeraappata, inuusuttuaraappata, inersimasuuppata, utoqqaappata, innarluutiliuppata, kisimiittuuppata, angerlarsimaffeqanngitsuuppataluunniit; tamarmik illersorneqarnisammik, ikiorneqarnissaminillu pisariaqartitsippata, sapinngisarput, pisinnassarpullu tamaat atorlugu ikiorneqarnissaat sulissutigisarparput. Inuit Ataqatigiinnimi aamma oqariartaaseqarpugut ikiorneqarnissamminik pisariaqartitsisut tamarmik ikiorneqartariaqarput.

Jens Frederik Nielsen Demokraatit siunnersuuteqarpoq inuuniarnermikkut ajornartorsiuteqartut pillugit siunnersuisooqatigiinnik Naalakkersuisut pilersitsissasut.

Jens Frederik Nielsenip siunnersuutaa pissanganartutut, soqutiginarutullu tigugatsigu Inuit Ataqatigiinniit oqaatigerusuppara.

Tamanna pillugu siunnersummut tunngassuteqarsinnaasunik paasiniaallungalu misissuisimavunga.

Paasisamalu ilagaat, qallunaat nunaanni 2002-mi inuuniarnermikkut ajornartorsiuteqartut pillugit siunnersuisooqatigiinnik pilersitsisoqarnikuusimasoq. Tamatuma kingunerisaanik kommunit assigiinngitsut aamma namminneq siunnersuisooqatigiinnik pilersitsiortorsimasut paasisama aamma ilagaat, soorlu københavnip kommunea 2010-mi pilersitsisimasoq paasisamat ilagaat.

Qallunaat Nunaanni inuuniarnermikkut ajornartorsiuteqartut siunnersuisooqatigiivisa suliassaasa pingaarnerit ilaat tassaasimavoq oqaaseqartartuuneq – talerør inuit pineqartut makku pillugit;

Angerlarsimaffeqanngitsunut, imigassamik ikiaroorartumillu atornerluisunut, atorittartunut, tarnimikkut napparsimasunut, allatigullu inuuniarnermikkut ajornartorsiuteqartuusunut.

Qulaanilumi taakkartorneqartut tassaapput inuiaqatigiinni sanngitsoortatsinnut ilaasut, ikorfartorneqarlutillu ikiorneqartariaqartut.

Taamaattumunguna Jens Frederik Nielsenip siunnersuutaa soqutiginarfillugu pissangartikkipput aamma oqaloqataaffigerusukkipput.

Qulequtaq tamanna pillugu Jens Frederik Nielsen, Naalakkersuisunut § 37 naapertorlugu apeqquteqaateqarsimasoq paasivarput. Jens Frederik Nielsenip apeqquteqaatigaa aningaasaqarneq pillugu siunnersuisoqatigiinnut assingusumik inuuniarnermikkut ajornartorsiuteqartut pillugit siunnersuisoqatigiinnik pilersitsinissamat Naalakkersuisut isumaat sumiinnersoq?

Naalakkersuisut akissuteqarnerminni allapput; *“Atugarliortut pillugit suliassaqaarfimmi siunnersuisoqatigiinnik assingusumik pilersitsinissaq periarfissaanngitsoq Naalakkersuisut naliliiffigaat. Tamanna pissuteqarpoq, ataatsimut isigalugu suliassaqaarfik pillugu paasissutissanik tigussaasunik annikitsuinnarmik peqartoqarmat. Taamaattumik atugarliortunut siunnersuisoqatigiit Aningaasaqarnermut Siunnersuisoqatigiittulli inassuteqaateqarsinnaaneri ajornakusuussaaq.”*

Ullutsinni nunatsinni angerlarsimaffeqanngitsut amerliartorput aamma imigassamik ikiaroorartumillu atornerluineq annertuallaartoq tamanna ilisimallualereerparput, minnerunngitsumillu tarnimikkut napparsimasut aamma nunatsinni takussaagaluttuinnarput, allatullu inuuniarnermikkut ajornartorsiuteqartoqartoq aamma nalunngillualereerlugu.

Qallunaat Nunaanni inuuniarnermikkut ajornartorsiuteqartut siunnersuisoqatigiiffiisa suliassaat pingaarneq tassaaginnarpoq pineqartut sinnerlugit oqaaseqartartuussallutik, illersuisuussallutik aamma taakkununga apeqqutinut tunngasunik aaqqiissutaasinnaasunik naalakkersuinikkut suliaqartunut inassuteqaasiortassallutik.

Taamaattumik.....

Inuuniarnermikkut ajornartorsiuteqartut pillugit siunnersuisoqatigiinnik pilersitsisoqarnissaa ilumut pisariaqartinneqarnersoq, tunngavissaqarnerorlu ataatsimiititaliami qulaajarneqarnissaa kissaatigaarput. Imaluunniit ikiorneqarnissaminnik pisariaqartitsisut allatut qanoq ikiorneqarsinnaanerat matussuseqarsinnaanersooq qulaajarneqarnissaa kissaatigalutigu

Taamatut naatsumik oqaaseqarluta, Naalakkersuisut allannguutissatut sinnersuutaat taparserparput qulaani taakkartorneqartut ataatsimiititaliami eqqummaarfiggineqarnissaat innersuullugu.

Qujanaq